

Date – 16/10/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizoram sorkar chuan vawk pul hri leng mek African Swine Fever chu State Disaster ah a puang.
2. Mizoramah Fur ruahtui a hul chho tan a, tunkar chhungin ruah tih tham a tla lo tura hmuhlawk a ni.
3. Prime Minister Narendra Modia chuan hmun kilkhawr ber thleng phaka khawl changkanna hman a ni tawh chu lawmkawm atih thu a sawi.
4. Election Commission of India chuan Maharashtra inthlan hun atan November ni 20 leh Jharkhand inthlan hun atan November ni 12 leh ni 20 a ruat.

<><><>

ASF-STATE DISASTER

Mizoram Disaster Management & Rehabilitation Department chuan vawk pul hri leng mek African Swine Fever chu State Disaster ah a puang.

Sawrkar thuchhuah tarlan danin ASF chu state disaster-a puan anih bakah State Disaster Management Authority (SDMA) hriatpuina in kum 2024-a khuarel chhiatna zingah ziah luh a ni a, SDMA State Executive Committee chuan ASF avanga Mizorama harsatna hrang hrang thleng leh sum hloh hi Disaster Management Act, 2005 hnuaiyah State Disaster Response Fund (SDRF) atanga zangnadawmna pek an ni dawn a, a kalphung turah State leh Sawrkar laipui Disaster Response Fund kalpui danin hmalak ani dawn tih an sawi bawk.

Hemi chungchangah hian AH & Vety Minister Pu C. Lalsawivunga chuan kar hmasa nilaini-a Vawk suat avanga zangnadawmna semchhuah phalna a tlangzarhna ah ASF hri leng chu Mizoram in an tuar nasat avangin State Disaster-a puan turin hma an la a ti a, vawk thite sumdawmna a hmang a, zuar an awm thin chu tawp se a duh thu a sawi a, natna darh zel loh nan fimkhur theuh turin mi tin te a chah a, Vawk vulhtute rilru put hmang siam that a tul thu sawiin, ASF avanga vawk thi te tuihawk luankawr, khama paih leh uluk lo taka phum ching an awm thin chu pawia tih thu a sawi bawk.

ASF avang hian kuminah Mizoram hmun hrang hranga khua leh veng 246 ah vawk 13,889 a thi tawh a, vawk 23,272 suat ni tawhin Mizorama ASF hri a len tirh atanga nimin thlenga vawk thi leh suat chu nuai 1 sang 9498 a tling tawh a ni.

<><><>

RATION CARD

Food, Civil Supplies & Consumer Affairs Minister Pu B. Lalchhanzova'n Mizoram ration card siam mek chungchangah dinhmun tha zawk ten anmahni aia dinhmun tha lo kian thiam se a duh thu a sawi.

Akashvani palai zawhna chhangin Pu B. Lalchhanzova chuan National Food Security Act hnuaia Mizoramin quota a neih mek chu nuai sarih, sing ruk leh zahnih sawmkua paruk (7,06,296) a ni a ti a, NFSA Mizoramin a neih mek chuan a mamawh leh a phu te huap zo ngei se a duh thu sawiin, sorkar chhawmdawl ngai chinte chu lut kim ngei se a duh thu a sawi.

Supply Minister chuan dinhmun tha zawk chhungkuain anmahni aia dinhmun chhe zawk kian thei se a duh a ti a, NFSA Committee pawhin Party in duhsakna rilru paihin an veng leh khua theuhah thlei bik nei lo in kalpui se tih chu Mizoram sorkar duh dan a ni, a ti bawk.

Kumin October thla atangin FCSCA Department chuan ration card var neite tan buhfai man a tipung a; buhfai sem leh hmasak ber atangin ration card var neite buhfai khul man kg khatah cheng 30 a ni tawh ang.

Tun dinhmunah ration card siamthat hna hi an la zo chiah lo a, buhfai man tih pun a nih rual chiah hian Retailer te lawmman pawh tihpun a ni a, Tun hmain retailer ten buhfai kg 1-ah duli an hlawh thin a, buhfai sem leh atang chuan kg 1-ah cheng khat leh duli an hlawh dawn a ni.

Supply department chhût danin Mizoram hian tun hma chuan a man tlawma buhfai pek chhuah vangin kum khatah cheng vbch 135 vel a seng thin a, tuna ruahmanna thar anga kalpui a nih hunah chuan kum khatah cheng vbch 80 vel a seng thung ang. Tun hma lama sawrkar sum sen tlak hniamna tur hi kum khatah cheng vbch 63 vel a ni thei dawn a ni.

◇◇◇◇

SAITUAL

Saitual District Bawrhsap Dr Lalgura Tlau chuan nimin khan, NHIDCL kawng laih mekin a paltlang Keifang kawngpui sira in leh lo nei engemaw zat, laih remtilote a hmunah a enfiah.

Heng zingah hian Compensation lak tur zata lungawi lo te, Compensation la tawh In la thiat lo te, Sawrkar ram(road reserved)a in sa te, kawngpuiin a sut loh tura ngaih, tel leh si te an tel a ni.

Bawrhsap chuan mahni ram/in hmun lo ram (LSC) chin te chiang taka enfiah a, hrechiang thih turin mipuite a chah a, Compensation chungchanga buaina tam ber chu an ram area an hriat chian tawk loh vang a ni a ti. Kawngpui a that chuan ram a changkang a, hmasawna chak taka a kal theih nan harsatna siam lo turin mipuite a chah a, Keifang paltlang khua, district, state leh international boundary-te a awm avangin mi tam takin an chhawr tangkai kawngpui a ni a, a that thuai a tul a ni, a ti.

Khaw chung a In sa tam tak te'n sorkar ram kawngpui (road reserved) lam nekin, pillar phunna atanga kawngpui lam nek zelin in hi sak a ni tlangpui a, hei hi a chhan ni bera lang chu LSC rules and regulation ah road reserved inziak hriat chian loh thin vang a ni. Highway chungchanga buaina tam zawk chu in leh lo rei tak lo din tawh te'n mahni ram emaw ti a road reserved-a In sa

an nih thin avangin sawrkar lam hotute leh mipuite inkarah harsatna alo awm ta thin a ni a ti.

Saitual Bawrsapin an enfiah hnu hian NHIDCL lam chuan hna chhunzawm leh nghalin khawchhung kawngpuite pawh khawih zui nghal a ni.



SINLUNG HILLS COUNCIL

November ni 5 a Sinlung Hills Council inthlan vawi 2-na atang Party hrang hrang ten campaign beihpui an thlak tan a, he inthlan lo awm turaah candidate 49 an awm dawn.

Sinlung Hills Council-a bial 12 inthlanna awm tur chuh tumin mi 50-in an hming an pelut a. October ni 11 khan an hming pekluchte hi endik a ni a. Hming pete zawng zawng hian endikna an paltlang vek a, nimin thawhtanni tlai 3 thleng inhnudawhna hun hawn niin hetah hian BJP Candidate pakhat chu a inhnukdawk a ni.

Sinlung Hills Council inthlan hmasak kum 2019 ah khan candidate 41 an awm a, tun tumah hian hmeichhe candidate pawh telin inhnukdawk pakhat a awm hnuah candidate 49 in an chuh dawn a, heng zingah hian ZPM leh HPC tang dunin seat awm zawng zawng 12 an chuh dawn a, MNF leh HPC-R in seat 12 chuhin Congress pawhin Seat 12 an chuh dawn a, BJP in candidate pakhat neiin Independent a chuh tur mi 14 an awm dawn a ni.

Sinlung Hills Council bial 12 zinga bial 6 hi Aizawl district huam chhunga awm a ni a, bial 4 chu Saitual district-ah awmin Kolasib district-ah bial 2 a awm bawk. Khawlian, Tingmun leh Saipum bialah te candidate 6 an awm a, Phuaibuang bialah candidate 5 an awm a. Suangpuilawn, New Vervek leh Saiphai bialah candidate 4 theuh awmin bial dang – Vanbawng, Ratu, Sakawrdai South, Sakawrdai North leh Zohmun bialah te chuan kil thumin an inchuh dawn a ni.

Inthlanna lo awm turah hian vote nei mi 23,794 an awm a. Vote nei zinga 11,875 hi mipa an ni a, hmeichhe vote nei 11,914 an awm bawk a ni. Sinlung Hills Council hi July ni 5, 2018 atanga hman tan Sinlung Hills Council Act, 2018 dan tlawhchhana din a ni a. November ni 5, 2019 khan inthlanna hmasa ber buatsaih a ni.



WEATHER

Mizoramah Fur ruahtui a hul chho tan a, khawchin thlirlawkna Meteorological Centre, Aizawl in a tihchhuahah chuan nimpiniah ni 14 atang khan fur hi a zo tan a ni.

Kumin June thla atanga Sept thla thleng khan Mizoram chuan ruahtui a dawng tam hle a, nikum aia a tamna hi zaa 7.97 a tling a ni.

India Meteorological Dept, Meteorological Centre, Aizawl Director Pu Sudheer Kumar Dwivedi-a chuan kumin hian Dist 3 Serchhip, Lawngtlai leh Siaha tih lohah chuan ruahtui hi kum hmasa aiin a tla tam zawk vek a ni.



PMAY

Sorkar laipui hnuaiia Thingtlang mirethei In sak tanpuina Pradhan Mantri Gramin Awas Yojana PMAY(G) chu Mizoramah pawh kalpui mek a ni a, tunah hian sorkar laipui atanga sum hmuh za zela zaa 70.03 chu pek chhuah a ni tawh.

Akashvani Aizawl thu dawn danin, sorkar kum 2023-24 atan Mizoram chuan PMAY atan hian kumin March thla khan cheng nuaih 5178 leh sing sarih sang nga a dawng a, state sorkar chuan a hun takah sum hi pe chhuak nghalin a hmanna tura hman nghal a ni.

Rural Development Department Director Pu K. Lalrohluah sawi danin, state sorkarin a tum ve tur cheng nuaih 575 sing li leh sang hnih chu tunah hian Finance Department lamah bawhzui mek a ni a, state nodal account lamah a luh thuai beisei a ni a ti a, SECC 2011 data hmanga dawng tur ten an dawn fel hnuah Awaas plus 2018 a thlan chhuah ten in sak tanpuina hi an dawng mek a ni, a ti bawh.

PMAY hi Mizoram chhunga district 11-ah te kalkpui vek niin, district pathum - Aizawl, Khawzawl leh Saitualah te chuan pawisa pek chhuah tur hi pek kim a ni tawh a, district dang pariatah erawh pek kim a la ni lo thung.

PMAY (G) In sak tanpuina hi kum 5 dang atan pawhsei leh tura Union Cabinet chuan kumin August thla khan a pawmpui tawh a ni a, kum 2028-29 thleng a huam ang. Tunah hian a chhunzawmna tur buaipui mek niin, BDO tin ten hemi atana a thawk tur te VLAA te registration PMAY(G) portal ah an nei mek a, hemi tih fel a nih hun ah PMAY(G) dawng tur te hi thlan thar a ni ang.



PM

Prime Minister Narendra Modia chuan hmun kilkhawr ber thleng phaka khawl changkanna hman a ni tawh chu lawmawm atih thu a sawi. International Telecommunication Union (ITU)- World Telecommunication Standardization Assembly (WTSA) 2024, Bharat Mandapam, New Delhi-a neih a hawwnaah he thu hi sawiin Pu Modia chuan India-in mobile leh telecom lama hma asawna chu kum zabi 21-naa khawvel ngaihven ber a ni a ti a. Mobile leh telecom chu khawvel hmun dangah hmanraw tangkai tak pakhat ang chauha hmuh ni mahse India ah chuan telecom hi inbiakpawhna chauh ni loin hmasawna kairualna leh remchanna pe tu a ni a ti bawh.

He hunah hian Prime Minister Modia hian India Mobile Congress 2024 a hawng nghal bawh a ni. Ni li awh tur he intawhkhawmah hian ram 190 atangin mithiamte, industry hotute leh mi pawimawh tak tak sang thum chuang an tel dawn a ni.



MAHARASTRA & JHARKHAND ELECTION

Election Commission of India chuan Maharashtra inthlan hun atan November ni 20 leh Jharkhand inthlan hun atan November ni 12 leh ni 20 a ruat.

Maharastra-ah hian Assembly bial 288 ah inthlan hi thawh khata neih tur niin November ni 20 ah inthlan buatsaih a ni dawn a. Bial 81 awmna Jharkhand-ah hian thawh hnihin November ni 13 leh ni 20 ah Assembly inthlan buatsaih a ni thung ang. Maharastra Assembly inthlan hriattirna hi tun thla ni 22 ah tihchhuah a ni ang a, candidate te tan ni 29 thleng nomination thehluh theih a ni ang. Maharastra-ah hian polling station nuai 1 chuang siam tur a ni a, voter hi vaibelchhe 9.63 chuang an awm a ni.

Jharkhand-ah chuan tun thla ni 18 ah inthlan thawhkhatna atana hriattirna tihchhuah a ni ang a, candidate ten tun thla ni 25 thleng nomination an thehlut thei dawn a. Inthlan thawh hnihna hriattirna hi tun thla ni 22 ah tihchhuah tur niin ni 29 thleng nomination thehluh theih a ni ang. Jharkhand ah hian voter vaibelchhe 2.6 chuang an awm a. Polling station hi sing 2 leh sang 6 chuang siam tur a ni.

Heng bakah hian State 15 huamchhunga Assembly bial 48 leh Lok Sabha seat 2 by-election te November ni 13 leh ni 20 ah buatsiah nghal a ni ang a. Inthlana vote tla te hi November ni 23 ah chhiar a ni ang.

<><><>